



CRB Cultura Rumantscha en la Bassa
c/o Corsin Derungs
Bahnmatt 17
6340 Baar
079 307 26 37
culturaenlabassa@bluewin.ch



OK FESTIVALET
% Benedetto Vigne
Hardturmstrasse 120a
8005 Turitg / Zürich
078 714 36 51
bevi@smile.ch

Baar, november 2024

Dumonda per sustegn finanziel per promover la cultura rumantscha en la diaspora

Charas signuras e chars signurs

Anc oz sa regordan ils amis dal chant choral cun grond plaschair al concert dals renumads chors rumantschs Cantus Firmus e Ligia Grischa ils 22 d'avrigl 2023 a Cham. Il public è vegnì en massas ed è restà plain admiraziun. Curt suenter è la furmaziun vocala rumantscha LA TRIADA sa preschentada a Baar, cun las vuschs da Corin Curschellas, Astrid Alexandre ed Ursina Giger – mintgina in'artista extraordinaria. Cun quests dus eveniments musicals avain nus lantschà l'activitad da noss'unìun Cultura Rumantscha en la Bassa. Nus avain realisà che l'interess per la cultura rumantscha è grond, tant tar ils Rumantschs en la Bassa sco er tar blers auters amis ed amias da la lingua rumantscha. Nus sperain ch'i suondian anc blers auters concerts ed eveniments culturali memorabels. Nus essan plain motivaziun e cuntinuain cun gronda energia nossa lavur voluntara.

L'entschatta da zercladur 2024 avain nus preschentà concerts a Losanna ed a Soloturn – là avain nus gi l'onur da collavurar cun ils Singknaben da la catedrala Ursen. Nus avain uschia demussà che la communicaziun tranter las linguas naziunalas è medemamain in'opziun.

En l'avegnir vulain nus regularmain realisar activitads culturalas cun artistas ed artists, chors ed autras furmaziuns rumantschas ordaifer il territori rumantsch. Nus vulain porscher surpraisas comunablas per il dumber creschent da Rumantschas e

Rumantschs en la Bassa ed era vegnir pli datiers a l'ulteriura populaziun svizra interessada per la cultura rumantscha. La creaziun culturala en la Rumantschia è enorm variada e da gronda qualitad, spezialmain en il sectur dal chant e da la musica. Nus cuntinuain! Nus avain blers plans: Ils 8 da mars 2025 organisain nus, en collavuraziun cun l'uniun "Rezia Bassa" da Sargans e conturns, in concert cun il chor viril Surses en la baselgia dal convent da Pfäfers. Da la partida èn er ils renumads "Fränzlis da Tschlin" ed il grond chor d'uffants "Stimmwerkbande" da Cuir.

Ils 20 e 21 da zercladur 2025, be dus onns sunter la fundaziun da noss'uniun, avain nus l'onur da preschentar in veritabel "past da perdunanza". Grazia al sustegn da la Pro Svizra Rumantscha, dal UFC e dad auters fautors organisain nus l'emprim festival cultural rumantsch a Turitg. Il FESTIVALET porscha lecturas, referats e films, ma surtut musica rumantscha en tut sias variantas, da la musica tradiziunala enfin tar la musica contemporana, dal chant choral enfin tar il rock e jazz. Per l'emprima giada sustegnain nus uschia la scena creativa, dinamica e pussanta da chantauturas e chantauturs rumantschs e purschain uschia ad ella ina tribuna pli gronda en la Bassa, a numns sco Pascal Gamboni, Mattiu, Martina Linn, Bibi Vaplan euv.

E noss orizont tanscha anc pli lunsch: Mintg'on vulain nus organisar in concert grond, sche pussaivel ensemen cun uniuns rumantschas existentas. Er gia ans fatschentain nus cun ils plans per il segund Festivalet 2027.

Vegni ed As participai! Sinaquai che nossa visiun possia prosperar a lunga vista sin las tribunas essan nus dependents d'in sustegn finanziel. Ord quest motiv tschertgain nus commembras e commembers per noss'uniun – cun ina contribuziun annuala da 60 francs essas da la partida, e, sche Vus vulais, er cun concret agid e sustegn persunal per nossa finamira comunabla.

Nus beneventain era donaziuns supplementaras. Donaturs cun ina contribuziun da 1'000 francs u dapli pon profitar da differents privilegis, sco p.ex. entradas gratuitas, e vegnan sin giavisch er menziunads per num sin nossa pagina d'internet www.culturaenlabassa.ch ed en tut nossas publicaziuns.

Cun Voss sustegn contribuis Vus fermamain a la promoziun da la cultura rumantscha en la Bassa. Per quai da tut cor in grond «grazia fitg»!

Banca: UBS, Turitg IBAN CH26 0023 0230 8291 3401 B

Per tuttas ulteriuras dumondas essan nus adina a Vossa disposiziun:

E-Mail: culturaenlabassa@bluewin.ch

cordials salids

Corsin Derungs, president

Remo Pfister, cassier